



ქალაქ თბილისის მუნიციპალიტეტის საკრებულო



დადგენილება № 10-41

„ 19 „ მაისი --- 2017 ♣

ძ. თბილისი

„ქ. თბილისის მუნიციპალიტეტის ტერიტორიაზე მსხვილფეხა ან/და წვრილფეხა პირუტყვის ყოფნის წესის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 30 დეკემბრის № 20-93 დადგენილებაში ცვლილების შეტანის თაობაზე

„ნორმატიული აქტების შესახებ“ საქართველოს კანონის მე-20 მუხლის მე-4 პუნქტის საფუძველზე, ქალაქ თბილისის მუნიციპალიტეტის საკრებულო ადგენს:

მუხლი 1. „ქ. თბილისის მუნიციპალიტეტის ტერიტორიაზე მსხვილფეხა ან/და წვრილფეხა პირუტყვის ყოფნის წესის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 30 დეკემბრის № 20-93 დადგენილებაში (სსმ, ვებგვერდი: www.matsne.gov.ge, 05/01/2015, სარეგისტრაციო კოდი: 010270000.35.101.016111) შეტანილ იქნეს ცვლილება და დადგენილების პირველი პუნქტის „ა“ ქვეპუნქტით დამტკიცებული წესის:

1. მე-3 მუხლის მე-2 პუნქტი ჩამოყალიბდეს შემდეგი რედაქციით:

„2. სპეციალურ ადგილზე გადაყვანილი პირუტყვი მესაკუთრეს/მფლობელს დაუბრუნდება მხოლოდ სპეციალურ ადგილზე პირუტყვის გადაყვანის და მოვლა-პატრონობის ხარჯების ანაზღაურების დამადასტურებელი დოკუმენტების სააგენტოში წარდგენის შემდეგ.

2. მე-3 მუხლს დაემატოს შემდეგი შინაარსის მე-5 პუნქტი:

„5. სპეციალურ ადგილზე გადაყვანილი პირუტყვის პატრონის/მფლობელის დადგენის შემთხვევაში, სააგენტო ვალდებულია შეატყობინოს პატრონს/მფლობელს, მის საკუთრებაში/მფლობელობაში არსებული პირუტყვის სპეციალურ ადგილზე გადაყვანის ფაქტის შესახებ, ამ ფაქტის დადგომის მომენტიდან არაუგვიანეს სამი კალენდარული დღისა.“

3. მე-5 მუხლი ჩამოყალიბდეს შემდეგი რედაქციით:

„მუხლი 5. სპეციალურ ადგილზე გადაყვანილი პირუტყვის რეალიზების წესი

1. იმ შემთხვევაში, თუ 30 დღის ვადაში პირუტყვის მესაკუთრე/მფლობელი არ მიმართავს სააგენტოს სპეციალურ ადგილზე გადაყვანილი პირუტყვის დაბრუნების

მიზნით და არ აანაზღაურებს პირუტყვის გადაყვანის და მოვლა-პატრონობის ხარჯებს, პირუტყვის რეალიზება განხორციელდება ელექტრონული აუქციონის (შემდგომში - აუქციონი) ფორმით, შემდეგი წესით:

ა) პირუტყვის რეალიზაციასა და აუქციონის ჩატარების თაობაზე გადაწყვეტილებას იღებს სააგენტოს ხელმძღვანელი;

ბ) აუქციონის ფორმით პირუტყვის რეალიზაციას მოახდენს სააგენტო, სსიპ-საქართველოს ფინანსთა სამინისტროს მომსახურების სააგენტოს ელექტრონულ გვერდზე www.eauction.ge;

გ) აუქციონის ჩატარების თაობაზე გადაწყვეტილების მიღებიდან არაუგვიანეს 3 სამუშაო დღისა, სააგენტო ოფიციალურ გვერდზე www.animalsmonitoring.ge აქვეყნებს განცხადებას, რომელიც უნდა შეიცავდეს:

გ.ა) აუქციონის დაწყების და დასრულების თარიღს;

გ.ბ) სარეალიზაციო პირუტყვის სახეობას, რაოდენობას, მოკლე აღწერას;

გ.გ) პირუტყვის საწყისი სარეალიზაციო ღირებულებას;

გ.დ) უპირობო და გამოუხმობი საბანკო გარანტიის/ბეს ოდენობას;

გ.ე) ბიჯის სიდიდეს;

გ.ვ) საჭიროების შემთხვევაში აუქციონის ჩატარების სხვა პირობებს.

დ) იმ შემთხვევაში, თუ დადგენილია ცხოველის მესაკუთრე/მფლობელი, სააგენტო ვალდებულია რეალიზაციას დაქვემდებარებული პირუტყვის მესაკუთრეს/მფლობელს, აუქციონის დაწყებამდე 3 დღით ადრე წერილობით ან სატელეფონო კომუნიკაციის საშუალებით შეატყობინოს ელექტრონული აუქციონის დაწყების დრო.

ე) სააგენტო ვალდებულია აუქციონის გამოცხადებამდე მოიკვილოს პირუტყვის საბაზრო ფასი და საწყისი სარეალიზაციო ღირებულება განსაზღვროს ბაზრის კვლევით დადგენილი ოდენობის შესაბამისად.

ვ) აუქციონის დაწყების და დასრულების დროდ განისაზღვრება მინიმუმ 5 და მაქსიმუმ 45 კალენდარული დღე.

ზ) უპირობო და გამოუხმობი საბანკო გარანტიის/ების თანხის ოდენობა უნდა შეადგენდეს პირუტყვის საწყისი სარეალიზაციო ღირებულების არანაკლებ 10 %-ს და არაუმეტეს 80 %-სა.

თ) ბიჯის ოდენობა განისაზღვრება პირუტყვის საწყისი ღირებულების 5 %-ით.

ი) თუ აუქციონზე პირველად გატანისას არ განხორციელდება პირუტყვის რეალიზაცია, სააგენტოს ხელმძღვანელი იღებს გადაწყვეტილებას საწყისი სარეალიზაციო ღირებულების 25%-ით შემცირების თაობაზე.

კ) თუ ამ პუნქტის „ი“ ქვეპუნქტით გათვალისწინებულ შემთხვევაში არ განხორციელდა პირუტყვის რეალიზაცია, სააგენტოს ხელმძღვანელი იღებს გადაწყვეტილებას პირუტყვის საწყისი სარეალიზაციო ღირებულების 50 %-ით შემცირების თაობაზე.


ლ) თუ ამ პუნქტის „კ“ ქვეპუნქტით გათვალისწინებულ შემთხვევაში არ განხორციელდა პირუტყვის რეალიზაცია, სააგენტოს ხელმძღვანელი იღებს გადაწყვეტილებას პირუტყვის საწყისი სარეალიზაციო ღირებულების 70 %-ით შემცირების თაობაზე.

მ) თუ ამ პუნქტის „ლ“ ქვეპუნქტით გათვალისწინებულ შემთხვევაში არ განხორციელდა პირუტყვის რეალიზაცია, სააგენტოს ხელმძღვანელი იღებს გადაწყვეტილებას პირუტყვის საწყისი სარეალიზაციო ღირებულების 70%-ზე მეტად შემცირებული ფასით რეალიზაციის თაობაზე.

2. დაჯარიმების თაობაზე გამოცემული აქტის გასაჩივრება არ ათავისუფლებს პირს 30 დღის ვადაში პირუტყვის გადაყვანის და მოვლა-პატრონობის ხარჯების ანაზღაურებისგან.“.

მუხლი 2. დადგენილება ამოქმედდეს გამოქვეყნებისთანავე.

საკრებულოს თავმჯდომარე



გიორგი ალიბეგაშვილი

გ ა ნ მ ა რ ტ ე ბ ი თ ი ბ ა რ ა თ ი

„ქ. თბილისის მუნიციპალიტეტის ტერიტორიაზე მსხვილფეხა ან/და წვრილფეხა პირუტყვის ყოფნის წესის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 30 დეკემბრის № 20-93 დადგენილებაში ცვლილების შეტანის თაობაზე“ ქალაქ თბილისის მუნიციპალიტეტის საკრებულოს დადგენილების პროექტის შესახებ

ა) ქალაქ თბილისის მუნიციპალიტეტის საკრებულოს დადგენილების პროექტის (შემდგომში - პროექტის) მიღების (გამოცემის) მიზეზი/პროექტის დამახასიათებელი ძირითადი ნიშნები:

„ქ.თბილისის მუნიციპალიტეტის ტერიტორიაზე მსხვილფეხა ან/და წვრილფეხა პირუტყვის ყოფნის წესის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 30 დეკემბრის № 20-93 დადგენილებაში ცვლილების შეტანის თაობაზე“ ქალაქ თბილისის მუნიციპალიტეტის საკრებულოს დადგენილების პროექტი მომზადებულია საქართველოს ადმინისტრაციულ სამართალდარღვევათა კოდექსის (შემდგომში - ადმინისტრაციული კოდექსი) მოთხოვნებთან შესაბამისობაში მოყვანის მიზნით.

„ქ.თბილისის მუნიციპალიტეტის ტერიტორიაზე მსხვილფეხა ან/და წვრილფეხა პირუტყვის ყოფნის წესის“ (შემდგომში - წესი) მე-3 მუხლით დადგენილია პასუხისმგებლობის ფარგლები ამ წესის დარღვევისთვის. აღნიშნული რეგულაცია ითვალისწინებს სპეციალურ ადგილზე გადაყვანილი პირუტყვის (მუნიციპალურ ტერიტორიაზე დაფიქსირებული უმეტესაყოფიეროდ მყოფი პირუტყვი) მესაკუთრისთვის დაბრუნების პროცედურას, ადმინისტრაციული კოდექსის შესაბამისად დაკისრებული ჯარიმის გადახდის, სპეციალურ ადგილზე პირუტყვის გადაყვანის და მოვლა-პატრონობის ხარჯების ანაზღაურების შემდეგ. ამასთან, წესის ამავე მუხლით განსაზღვრულია პატრონისთვის/მფლობელისთვის პირუტყვის დაბრუნების პროცედურა, მათ შორის ადმინისტრაციული ჯარიმის გადახდის ნაწილში. კერძოდ, მე-3 მუხლის მე-2 პუნქტის თანახმად, „პირუტყვი მესაკუთრეს დაუბრუნდება მხოლოდ საქართველოს ადმინისტრაციულ სამართალდარღვევათა კოდექსის შესაბამისად დაკისრებული ჯარიმის გადახდის ... შემდეგ“, რაც წინააღმდეგობაში მოდის ადმინისტრაციული კოდექსის 290-ე მუხლის მოთხოვნასთან, რომლის თანახმად სამართალდამრღვევის მიერ ჯარიმის გადახდის ვადა შეადგენს 30 დღეს, დაჯარიმების შესახებ დადგენილების ასლის მისთვის ჩაბარებიდან, ადგილზე დაჯარიმების შემთხვევაში - საჯარიმო ქვითრის მისთვის ჩაბარებიდან.

აღსანიშნავია, რომ წესის მე-5 მუხლის პირველი პუნქტით დადგენილია ადმინისტრაციული ჯარიმის გადახდის ზღვრული ვადა - 20 დღე, რომლის გასვლის შემდეგ, პირუტყვის მოვლა-პატრონობის ხარჯების (გამორჩენილია პირუტყვის გადაყვანის ხარჯები) დაფარვის მიზნით, პირუტყვის რეალიზება განხორციელდება საქართველოს კანონმდებლობით დადგენილი წესით. შესაბამისად, წესის მე-5 მუხლის მოქმედი რედაქცია ასევე წინააღმდეგობაში მოდის ადმინისტრაციული კოდექსის 290-ე მუხლის მოთხოვნასთან, რომლის თანახმად სამართალდამრღვევის მიერ ჯარიმის გადახდის ვადა შეადგენს 30 დღეს, დაჯარიმების შესახებ დადგენილების ასლის მისთვის ჩაბარებიდან, ადგილზე დაჯარიმების შემთხვევაში - საჯარიმო ქვითრის მისთვის ჩაბარებიდან. ანალოგიური კოლიზია ფიქსირდება მე-5 მუხლის მე-2 პუნქტშიც.

ამასთან, აღსანიშნავია, რომ მოქმედი საკანონმდებლო რეგულაციები არ იძლევა საშუალებას შემჭიდროვებულ ვადებში, არსებული რეალობის გათვალისწინებით მოხდეს თავშესაფარში გადაყვანილი ცხოველის რეალიზება იმ შემთხვევებში, თუ ვერ დადგინდა ცხოველის

მესაკუთრე/მფლობელი ან სხვადასხვა მიზეზებიდან გამომდინარე მან უარი განაცხადა ცხოველის დაბრუნებაზე. შესაბამისად, საკანონმდებლო ანალოგიების გამოყენების გზით მიზანშეწონილია შემუშავდეს ზემოაღნიშნული კატეგორიის ცხოველების რეალიზაციის წესი, რომელიც უზრუნველყოფს რეალიზაციის გამჭვირვალე და სამართლიან პროცედურებს, ელექტრონული აუქციონის ფორმით. ზემოხსენებული საკითხის დაურეგულირებლობის შემთხვევაში, სააგენტო შესაძლოა აღმოჩნდეს რეალური საფრთხის წინაშე, ვინაიდან სააგენტოს ცხოველთა თავშესაფარში რეალიზებას დაქვემდებარებული ცხოველების ყოფნის ვადები გაგრძელდება უსასრულოდ ან ხანგრძლივი ვადით, რაც ავტომატურად გამოიწვევს პირუტყვის მოვლა-პატრონობაზე გასაწევი ხარჯების მნიშვნელოვან, გაუმართლებელ ზრდას და მძიმე ფინანსურ ზიანს.

ბ) პროექტის საფინანსო-ეკონომიკური გაანგარიშება:

პროექტის მიღება არ გამოიწვევს აუცილებელი (დამატებითი) ხარჯების გამოყოფას ქ. თბილისის მუნიციპალიტეტის ბიუჯეტიდან.

გ) პროექტის ავტორი (ავტორები):

პროექტის ავტორია ქალაქ თბილისის მუნიციპალიტეტის მერია.

დ) პროექტის წარმდგენი:

პროექტის წარმდგენია ქალაქ თბილისის მუნიციპალიტეტის მერი.